



ATASSUT

UPA14/99-1

Gerhardt Petersen

08.05.2014

2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfiillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qallikanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinissaanut isumaqatigiissusiornissaq isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfiillu isumaqatigiissusiornissaat, taakkulu aserfallatsaaliorneqarnerannut akisussaaffiup inissinneqarnissaanut isumagineqaqqullugu, Siumut sinnerlugu Inatsisartuni ilaasortaq Anders Olsen matumani siunnersuummik saqqummiussaqqarpoq.

ATASSUT-mit siunnersuuteqartoq isumaqatigaarput, pingaartumik timersornerup siuarsaavigineqarnissaanut tunngatillugu Kommunit namminneq suliassamik kivitsisinnaanngippata suleqatigiilluni naammassinianeqarnissaat periarfissaasariaqartoq.

ATASSUT-mit soqutigigatsigu tapersorsorlugulu ivigaasanik qallikkanik arsaattarfiliortoqarnissaa Demokraatit sinnerlugit Inatsisartuni ilaasortaasimasup Niels Thomsen-ip siunnersuutaa, sumiiffinnut aalajangersimasunut pituttorsimanerugaluartoq, Inatsisartut akuersissutigisimasaat ATASSUT-mit malersornikuuarput timitaliisoqarnissaa soqutigigatsigu, taannali suliaq ajoraluartumik kivisimasutut isikkoqarpoq.

Taamaammat ATASSUT-mit siunnersuuteqartoq qujaffigaarput siunnersuummik matuminnga saqqummiussimmat, tamatumuuna sineriak tamakkernerullugu aammalu minnerunngitsumik Kommunit suleqatiginerullugit aaqjissuussisoqarnissaa ujartorneqarmat soorluuna ivigaasanik qallikkanik arsaattarfinnut qanillinerusoqassasoq.



Soorunami Kommunit pinngitsaalineqarsinnaanngillat, taamaattorli siunertaq pitsaaginnarani aamma timersortartortatsinnut annikinngitsumik iluaqutaasussaammat ATASSUT-mit neriuutigaarput Kommunit peqataarusussuseqarluarumaartut.

Matumani Naalakkersuisut kaammattuuteqarput arsaattarfinnik matoqqasunik toqqaasoqarnissaa orniginarnerusoq, ilaatigut ukiup ilarujussua apummit nunarput qallerneqarsimasarmat, taanna aamma soorunami nalilersorneqartariaqarpoq, tunngaviusumilli ivigaasanik qallikkanik arsaattarfiliortoqarnissaa ATASSUT-mit orniginartinneruarput, neriuppugulli taakku tamarmik Ataatsimiititaliamit nalilersorneqarluarumaartut.

Taamatut oqaaseqaateqarluta ATASSUT-mit inassutigissavarput siunnersuut akuersaartumik suliarineqassasoq, aappassaaneerneqartinnagulu Inatsisartut Kultureqarnermut Ataatsimiititaliaanut suliassanngortinneqassasoq inassutigissavarput.